



Москва васна «Россия» нэмпи Шимлаң мир центрэн просветительской марафон хоца «Россия – хаттэлэт хаттэл» Общество «Знание» водаң уйтантопса манас. Щита пилтащиты ораңна нил щёрс молтас нэңху касң мув суң эвалт ёхтылдыс. Ямал мув ици сансна ант хыцас, аратэдна хос нэңху яңхас – Овс мув шимлаң мир, Россия хон мув Ассамблея, общественной организацияйт, СВО хоца лялесам ях па волонтерат.

«Ямал мув нэңхэт щита пилтащиты – водаң вер, щи он-тасна Овс мув шимлаң мир нэңхэт культура этгалат па па мур потар туты тахайна лоңлат, ияха пилтащиты вер такамтты ораңна. Сэңк ям холна, энамты нэңхэт щита пилтащита лыттэл ораңна», – региональной отделение «Россия хон мув мур тэл Ассамблея» председатель Галина Косыгина лавас.

Там уйтантопса Россия хон мув гимн эвалт пунсса, аратал мир нэңхэт арита этсат. Ямал мув эвалт щи ораңна Кристина па Родион Пуйко яңхсаңан.

Ханты мир эвалт щита пилтащита Елена Сибарева яңхас, щи уйтантопса пуляң тамиты лавал: «Россия – хоттэлэт хоттэл. Хащам лапатаң Москва Хон вошеван Национальной Центр «Россия» хотан 2500-кем латлы мир доватан улты хоятат актащисат. Хота Россия хонэв Владимир Владимирович Путин там тал, кеша рут мират постама тала пуншсалды. Холта ар пелак энамты хоятат актащисат. Дув рут ясеңдан потарты мират, мирэл тайты хорам сохат усат. Мир яха актациям тахайн ясаң уйдысат куцайт, каш хотан рупитты хоятат, юраң касты хоятат, ляль харан удам хоятат. Дув щи потар версат, хоты Россия доватан ун онтас кашң рут мир верал, хоты йис улапсаел шавиман тайлэд па мувед аратыман па мосман тайлэд. Щи тумпийн туса вератты хоятат, арыты па якты хоятат каш эталтысат. Щита щи ма портрэмисам Сургутской район элты улты эвеңан Екатерина

Москва васна Мират ияха пилтащиты Тал пунсса



Хор: Елена Сибарева

Кантерова па Ольга Тэвлина пидан. Лув рут ханты ясаңан па шоши йис улапсаел шеңк мосман тайлалан. Дувилала умащ ус щимащ потар хота яңхтыя. Ай хоттэл элты ун мирэв елды энамал па юраңа йил».

«Россия – хаттэлэт хаттэл» марафон – щит водаң емаң хатл, хата эттала мала хорпи муң миру альпаң. Пилтащита ёхтам нэңхэт ищалт государственной деятелят, Россия хон мув героаят, касты ях, учёной па культура нэңхэт потарсат. Нэман верам вантапсайтна шимлаң мир сохат вантта рахас. Арыты па ёкты творческой мастер-классат хоца Ямал мув эвалт «Яберена Нумги» ансамбль пилтащийс.

Майдата ёхаты нэңхэт ораңна гастрономической яңхапса пунсылдыса, «Гастрономическая карта России» федеральной проект, щи ораңна лытытаң нартапат аматсайт па шимлаң мир лытыт давемата рахас. Дув кутладна холна йи программа – СВО хоца яңхам нэңхэт водаң верат эттада. Мета маса интерактивной проект пунс-



Хор: Елена Сибарева

са: «Мансаң луңатты нэпек», миртэл луңатты нэпекат па муң региону хуват олты мет хорам тахайт кина хуват эттады таха.

Щи томпына Россия хон мув регионат ораңна онлайн-формат хуват вул творческой турсыт ос: Ямал мув эвалт «Миксер» арт-резиденция хар Ноябрьск васна дарпатса. Щита «Сияние

Ямала» коллектив 26 нэңху эвалт шимлаң мир як эттасат. «Россия» нэмпи центра пилтащита ёхтам мур ораңна ици онлайн-формат хуват Овс мув шимлаң мир па энамты нэңхэт эвалт актама «Алгоритмика» клубной формирование вуца ясаң китсат.

Вера Лонгортова хансам потар

Ялап хул арталаты кеншак ураңан

Куш хонна тал, туп ин кашң куртан хул ведпаслаты ёх луң порая лэщатылат. Лув тумпилалан, рупата хардал хоша ищи ялап мутрайт доңалдайт. Нумасла «Цифровое рыболовство» луң унты туңащира лэщатты па щи онтасан елды рупитты.

Округ доватан ин нумасла: ялап пусмекат па терминалат кашң лашкупа омасты. Щи веран мохты ныты питда, мата щёсан па хатадан хул маса, муй хорпи рут хул, камн кила па хойн мийман уса. Щит артадала.

«Цифровое рыболовство» туңащира рупитты ураңан хонна интернет хоша доңты



Хор: национальнэпроект.рф

ант мосал. Щишан, иса ныты питда, хул мощатам вуш элты лапка я ёхаттал унты.

Тунял вуш элты там манты рупата элты хул ведпаслаты ёх пидан потар верыдыса. Щи

тумпийн кашң предприятие куцайт пидан арталаса, муй верты мосал. Луңан, там ялап вер ант сохнапты ураңан.

Хащам тылащ сохантыйн АПК департамент хоша рупитты хоятат куртат хуват яңхты питсат. Вантты, хоты луң пораята мир лэщатыйл. Мет олаңан лув Аксарковской па Салемальской рыбозаводата яңхсат.

Щишан, нын хоцайн куцайт ёхаттэл порайн, нын иса портартаты, муй мосал нын рупатайн яма манты ураңан. Муйн тарамлайты, ант тарамлайты – иса ясаң вераты. Щи веран нынана кеншак питад.

Аллина Тоярова
ханшам потар

Вуды ёх емаң хатлат ёхатсат

Хор: Галина Севли



Там сютсяты хатлат элты округев хуват вуды ёх емаң хатлат манлат. Курк тыдась нялхосьяңмет хатл элты ун кер тыдась нийлхусмет хатл унты шоши мир хоятлув ар тахаятан яха уйтантылат.

Кашң куртан, вошан касасайт, вантопсайт манлат, тынасты харат ларпитлайт.

Кашң ёхтыдыты хоят каш вантты, вулэң ухадан навралтыты, шоши мир ёх лэотт умасьдыты верытал. Ар пелак уйтантопсайт хон мувеван мират ияха пидтасыты Тада па округеван – тумтак улапса Тада постамап питлат.

Шоши мир хоятлув ураңан сит мет волаң емаң хатл. Си хатлатан лув рутлад пидан яха уйтантылат, тайты инсясапсайт, си кеша лэсытам тахайн лэрапты верытлат, яммалтыты рупитты харата яңхты, тал сыс ёнтам сохдал, пормасдал, сопаслаты лэоттотлад тынасты харан тыныты.

Хасям талатан па мир муват па хон мувев элты ар хоят вуды ёх емаң хатлата ёхтыдыл, шоши мир ёх улапса вантты утсийл. Кат тыдась сыс емаң хатлат манты питлат. Нын па ёхтыдыты, хорам, ольпаң емаң хатл вантаты.

Альбина Тырлина ханшам потар

Тумтак улапсая постама Тада лэсытам уйтантопсайт

2026
ГОД ЗДОРОВЬЯ
НА ЯМАЛЕ

Там пуш, тумтак улапсая постама Тадан, округев хуват хус волаң уйтантопса верда. Сита антом туп касты хошты ёх, ад хоятат па пидтасылат. Сит элты, округ куся пресс-служба ясаң верас.

Хон мув па региональной касасайт тумпийн, Ямал мув хуват ар хорпи фестивалат, турнират, мастер-классат, камн хорпи уйтантопсайт лэсытлайт.

Курк тыдасян «Ямал куся Кубок» Арктической волейбол ёнтопса турнир, «Лыжня России» дохан хухатдыты касаспа па «Горячий лёд» акция верда. Ай кер тыдасян Пулңават вошн па Приуральской районан нийл

номинация хуват, хон мув ветмет Арктической касасая апраң ёх акатла.

Товийн, округ волаң вошан «Полярная лыжня» марафонан па хон мув «Северный характер» Арктической экстремальной ёнтопсайн хоятат пидтасылат. Холдна «Забег.РФ» па СВО ветеранат защитник Отечества Кубок хося касты ёх уйтантылат.

Каркам па юраң хоятат луңан «Северный характер. Лето» па «66 параллель» региональной касасаята ёхатлат. Леккар хоятат постама емаң хатла, «Полярный круг» хухатдыты полумарафона касты ёх акатла. Сусан, муш тайты няврэмат ураңан «Яммалтыты хатл» фестиваль верда.

Кашң уйтантопсайн, касасайн волонтерат-медикат ру-

питты питлат. Хоятат ураңан мастер-классат альдат, уйтантопсайтан потар тулат, хувшак па ант кашитты ураңан, муй хорпи лэотт лэты рахал, арадалан, таксара йиты ураңан муй верты мосал.

Ияха тал сыс няврэмат, энамты ёх, студентат, муш тайты па ун хоятат ураңан катсот молтас яммалтыты уйтантопсайт па касасайт манлат.

Альбина Тырлина ханшам потар



Хор: Владислав Мокк

Мет ёраң ях пирьты ораңна

Курк тыдащ 5-мет хатл эвалт 9-мет хатл маса Пулцаватна северной многоборье хуват Ямал мув Чемпионат па Первенство 16-17 тал касты ях ораңна манас.

Касты па ёрдл арталаты ораңна Лорвош, Тазовской, Приуральской, Пуровской, Ямальской районат па Пулцавт эвалт яха актацисат. Аратэдна 86 нэңху ос, лув орцидална вет касты хар дарпительса: щит

Хор: Анжелика Лонгортова



Хор: Андрей Ткачев



холам пус навармиты, охал сопшы наварты, юх пидна нёхамтыты, лайм воцкемиты па тынщаң явалмиты.

Щи касты хар мет ёраң ях северной многоборье хуват пирьты ораңна верса, щи юпина лув Ямал мув эвалт Россия

Чемпионат па Первенство хоща каста питлат.

Кастытат кутна мет ямас лувел Анжелика Лонгортова этгаслы: юх пидна нёхамты тахайна холмет таха вус, тынщаң явалмиты па охал сопшы наварты тахайданна

– алциц этас, щиты, многоборье хоща юниорат кутна алаң таха вус. Анжелика Станиславовна Лонгортова Лорвош район Овкурт эвалт ёхтылыйс, лув северной многоборье касты ашкодайна яңхал, щита Василий Лонгор-

тов ропытал, энамты нявремат каста онттал.

Ор яхат кутна, Ямальской район эвалт Сергей Витальевич Лаптандер 902 охал сопшы навармас па алциц этас.

Вера Лонгортова хансам потар

Сорашак айкел моцатты ураңан

«Лух Авт» газета кашң лапат йи пуш этлыйд. Тухал ишан, ёхаттал унты талаң лапат хаңал. Щи веран, сорашак айкелат моцатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоща моцаттыты.

Щи ураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тьел-тохел поныдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасан елды тулэв, ханты мир ясең шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоща улты мохета мадайт. Щи тумпийн нэңдала, няврэмдала, аңкидала па ацидала ищи нётопса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим из других регионов возмещаются затраты на проезд от места проживания до г. Салехарда. В период оформления проживания в г. Салехарде и 3-разовое питание предоставляется бесплатно.

ОБУЧЕНИЕ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННО ОТ РЕГИОНА
до 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО **ОТ 225 Т.Р.**

Там мосванан Канась курган «Шукцатты пора» вантопса пунпша. Сита Елена Алексеевна па Наталья Яковлевна, Шульгин опрась нэм тайты Асов нэңдан, па Анастасия Никитична Сэротэтто Харсойм курт элты, лув ёшлдан туса верам рупатайдал эталтыдайт.

Си вантопсайн Анастасия Никитична, Елена Алексеевна потарсаңан, хоты симась хорамат тыйлат. Щашкан, нуй па вуды сох элты хорам ханшийн дэсытам ёх хоят, няврэм, нэңат ёнтам ернасат, охшамат, нуй сахат, модсяңат, сахат, худ поням элты дэсытам пормасат па ханшаң паркан элты сэвам посат, сэвам вайт сита умасьдыты рахал.

Рупатайдалан эталтыты ханты улапса

Талан тайты сохат туса ёнтал

Анастасия Никитична Сэротэтто (Тользина) там вантопсайн лув ёшлдан ёнтам талдан луматты ханты сохат: сахат, модсяңат, вайт эталтысды. Улапсайл па пормасдал элты каматса ясаң верас: «Ма вуды хотан сэма питсам. Аңкем-асем тащан яңхсаңан. Катра порайн, ун асем Николай Дмитриевич Тользин, Ёмвош округ Касам курт элты Приуральской нюрма каслас. Аңқаңкем – Анна Павловна, Кондыгин рут элты. Икем опрась нэмал Сэротэтто. Аңкел, аңқаңкел па хантэңдан.

Ма ай пора элты вантсам, хоты аңкем ёнтасал. Нэмал Ирина Петровна Кали. Лув манэм уталтасды. Муң ар няврэм усув. Ин туп нийл хоят хасьсув. Вет эви, худам пох. Яйдам хол вуды шавиман улдат. Ма икем па няврэмдам пидан Харсойман улдув. Хут няврэм тайламан.

Катнэв студентдан, худам – ашкудая яңхал, ит садика.

Там вантопсая талдан тайты сохат тусам. Сохдам, хун курта касалсув ёнтсадам. Хун кум тайдам – иса вератдам. Кашң порайн ёнтасты лытлайм. Сохдам хотгэл хоятлама ёнтдалдам. Няврэмлама, икема – модсяңат, вайт. Манэма па эвилама – сахат. Хасям талатан ай няврэмлама тата эталтыты молсяңдам ёнтсадам.

Вантопсайн эталтыты сохат яңкем тал сыс ёнтсадам. Похем уншака йис, вайн ёнтсэм, эвидам – буркайн. Манэма ёнтам худам сах па ты тусам. Йи саха, ун вуды сохат ки улдат, катлэм тармал. Аршак ханшийн



ки ёнтла. Илтайл йи сохан тарамла. Лыпия па худамлэманял нёпилув сох. Ханшидам ёнтты ураңан, татдасты верки ант луңатты, тыдась, мосаң шималшак мосмитад. Хун кашң порайн ёнтдан, антом шеңк хув.

Няврэмдам вуды ёх емаң хатл шеңк давалдат. Си порайн

хол хорам сохлүв луматлаллүв. Ма хун ай усам, иса си емаң хатл давалсам, ин няврэмдам – иситы».

Хор: Альбина Тырлина

Там мосванан туп вератты питас



Хор: Альбина Тырлина

Там вантопсайн Елена Алексеевна Шульгина нэңат тайты сохат эталтыйс. Си тумпийн тонты элты, худ поням сох элты

хирыет тус. Хун пенсияя манас, си порайн туп вератты питас. Рупатайдал элты ситы ястас: «Сютсяты манмем юпийн, ёнтасты, сэвты питсам. Иса алаңсахат элты ил олтэм унты омасты верытдам. Эвидам энаммел порайн, ин хол лув семьяйт тайлат, ернасан ёнтыдысдам. Там вантопсайн кат нуй сах, худам ернас щашкан сах пидан луматгыя тусам. Сэвам антапкедат тайдам, ёрн хырат худ поням элты. Тунялт худ шук верты уталтысам. Одаңан ай сорт сох элты ёнтсам, юхат нови худ элты. Опием няхал, ястал: «Катра ма туп доват наңена актыдысам, ин па худ сохлан па мослат. Апдам муйн лапатты питлалдам?»

Ёнтты сохдам «Душа тундры» фестиваля дэсытыдысдам. Иса ёшан ёнтсадам. Ма нумастэман, хун сох ёнтла, антом туп ернас мосал. Сэвам вай, нир па ат тайл. Холна антапкедан, росең

охшаман, щашкан сахан дэсытлэм. Хол иса яха ат дойдат. Ханты хоят, ванты, хорамаңа елта ат вантасас.

Аңкем улмадан, иса молты верас. Кашң эвел сахан, вайн дэсытсалды. Ма эвидам па вайн ёнтсалды. Ай порайн улмеман, лув ханшам ханшидал нэпека пондалдам, нэпек хуват сюрытлалдам. Пенсияя манмем юпийн, ямашак ёнтасты питсам. Ма муй тахайн улдыдам, катра пормас эталтыты тахаята яңхдам. Суматвоша яңхтэман, симась тахаята иса лоңтыдам.

Тамась вантопса харатан манэм сикем умась ултыя, ёнтам пормасдам эталтысайт. Елды педа па ялап сохат ёнтдам».

(Елды па ул)

Альбина Тырлина
ханшам потар



Шоши мират емаң хатл ураңан айкелат верас

Имолтгын куртаң хары кутопн катра вушат элты яма уятты ханты ики пидн ияха уйтантса-ман па мин кутэмн япсыена по-тарсаман. Там хатнэху 2000-мет тал вушн Русскинской куртаң кутоп ашкулайн ханты няврэмат уталтас, муй щирн вулэт тайтыя па давалтыя рахал. Щиңанца ма потра лувел хуцсэм:

– Константин Иванович, наң рут щирн тайты мувен элты матты айкел тува.

– Ма опрац нәмем Константин Иванович Сопочин. Ин там ёхи хащам талатн ийимем сакңан пенсияйн удламан. Мин юканәва вулы ләккет тайлүв па щитат пидн кашң хатл сьс айлтыена волкемалүв. Щи тумпийн, ванта, катра щирн ма ищиты туп пора-порайн худ па вой велпаслаты яңхдам. Щит там йисэвн туп ләтот ураңан велпас верат тайдам. Ма тамац нови туром илшия 1957-мет талн Тромаган ёхан хоща опсам унт куртәма ёхатсам. Щи порайн советской лац талат усат па ащем ики худ муй вой велпасламан Сорханл рыбоучасток хоща рупитас. Щиңанца щи тахайн ун вулы тащ ус. Щи ураңан кашң талн муң велпаслаты хоятлүв нял муй веткем вулгын иса мийдысайт, лудан лый худ велпаслаты муй унт пелка вой каншты яңхсат па государстваев арсыр планат япсыена па туңащира тәкнаптасат.

– Наң, алпа, ашкула-интернатн ай порайт вуш элты усан па елды уталтысан?

– Ма Ермаково куртан нийлмет тал вуш унты верам ашкула-интернат хотэмн айтәдн усам па уталтысам. Щи Ермаково куртәв ищиты Туром ёханәв хуватн опсас, лудан ханты

Кашң тал товийн Русскинской куртан Сорханл районан Вуләң, худ па вой велпаслаты ёх емаң хатлна мир яха актацийл. Щи порайн ма ищиты рупатаем щирн айкел акатты щий нәман китыдысайм.



Хор: Владимир Енов
Рут муваң ханты ёх, мата хоятат емаң хатла Туром ёхан мув элты ияха актацсат.

хоятлува кеншак ус тохи яңхты па няврәмлад уталтаты щий кашң пуш тутлиты. Ашкулайн уталтыты верат шеңк самаңа тайсам, яма усам па уталтысам. Наң, алпа, хулдилысэн, хоты арпелак сорханл хантәт ашкулайн иса ант па уталтысат. Щи хантәт кута ма ищиты шеңк щи рахдам. Щиңанца ащем мушаңа йис па сорма питас. Ма щи порайн туп хутмет класс хоща уталтыты питсам. Кашң хатл нумассам, муй щирн аңкем утща щирн ащидам әнмалтал па арсыр лавартаң рупатайт кашң хатл сьс иса ләщатл.

Щитәмн нумассам, нумассам па ашкула-интернат хотэм элты ма ёхдам улты унт куртәма щи хонтасам. Мет олаңан иса ёлан аңкема ащидам әнмалты нәтсам. Юхат, еша уншака йисам, па

ищиты худ па вой велпаслаты Сорханл вош рыбоучасток тахайн питсам. Ин тухал порайн щиты щи нумасдам, а муя ма уталтыты верәм воцкасәм? Манәма кушке-па нийл талпи классаң ашкула щи порайн етшаптаты мосас. Там йисн, ванта, сыр-сыр ялап верат иса туңа-щира па япсыена уйттыя мослат. Катра ант уталтысув, щи ураңан лавартшак муңев там кутатн елды улты-холты.

– Константин Иванович, наң ашкулайн няврәмат уталтаман щи рупитсан?

– Ямкем арат тал сьс унашак ювам ху няврәмат вулэт давалты верата айлта уталтасам. Шеңк умац ус манәма ай ёхдам пидн рупитты. Ин щи хоятат па холдыена энапсат, хотгәл ёхаңа йисат, муң пораятн ищиты ияха уйтантылүв.



Хор: Владимир Енов

Константин Иванович Сопочин

Мет олаңан Русскинской кутоп ашкулаева па тахайт элты ёхтам руцат муй па мирәв хоятат вулы давалты верата ханты няврәмат уталтаты вохидысайт.

Щалта щи ёхлүв кашлы щимащ верат пела усат. Ванта, па муват элты ёхтам хоятат вулы хун вантыдысат. Щи ураңан юхат ма кашащсам па ху няврәмат вулэт пидн катласытыя щи уталтасам.

– Кашң тал Вуләң, худ па вой велпаслаты ёх емаң хатл Русскинской куртан манал. Хантәт лый кутәдн вуләң ухлатн касты вуянтлат. Муй хораспи мойлапсаятн олаң тахаята питты хоятат куца ёхатн мойдалайт?

– Вуләң хоятат там йисн куш ху ёх, куш нәңат олаң тахая питты ураңан куца ёхлүвн кашң емаң хатадн тутаң ухлатн «Буранан» катлапалайт. Ма щирәман, щит шеңк ям па мосты мойлапса унт куртан улты ханты хоятлува.

Щалта кимет тахая касты пораятн ёхатты ёхлува-нәңдува па хон пелак хоп сәвас мотор мойлада. Щиңанца хулмет тахая ёхтам ху па нә хоятат нови тут верты (дизельная электростанция) китамтак мадайңан. Ма ин щи ястадам, хоты шеңк ям мойлапсаятн ёхи хащам талатн там касапсаятн хантәт мадайт.



Хор: Владимир Енов
Вуләң ухлатн унт куртан улты хантәт лый кутәдн касты ёхатсат.



Йис тэлна нэңхэт мир потрат олапсы эвалт вудат



Карра йис пора эвалт нэңхэт мир потрат олапсы эвалт вусат, эвалсат. Олды хуват торам, мув хорас педа вантман касң хатл щирл-щирл (примета) этас, щит лув аса йи хатлна ант этсат, щит тадаң мур олдад хуват вантас, па онттыяс, номсална понсалды. Итта щи карра потрат педа вантман, муң мули ошду, мала хорпи торам хорас халэват олда питл, тал педа вантман мули ошду мала хорпи луң питл. Касң потар олды хуват акатса па алңищ манас.

Мет алңищ ёхам ворна ими дэл юх элты ки датл, товы ван олда питл, пал юх элты – товэл хув питл.

Йи пукна амасты ворңайт, мала йир педа охлад кератман олат, щилта ват полта питл.

Ворңайт юх хоца такан ханман ки амаслат, атам торамми йил.

Тахтаң ики йиңкна амасман ки увал – ерт вахал.

Охаль мир потрат

Най ки палтан ол, па ватас – сара товы олда питл.

Кадаң аңатлад ки кияралайт – ищки олда питл.

Амп ланьщ лыпина ки коратлияд – ватассы йил.

Куккук ими, мет алаң сыящты пахлат алаңна ки ёхатл – рэх щи луң сымал олда питл.



Руц мир потрат

Тадал ки ланьцаң – луңал ертаң. Тадал ки сарам па ищки – луңал сарам па каврам.

Тадал ки хасам – луңал ищки.

Тадал ки ищки – луңал хасам.

Тадал ки ватасаң – луңал ертаң.

Ор ях мир потрат

Кадаң ват сасна ки эпсэнд – ват кердал. Халца кадаң эпсэнд, щилта ват полта питл.

Най паслад ки сомтас – ищки олда питл.

Ведпаслата ки алаң манлан – аян иёлты наң пилэнна олда питл.

Хул лар эвалт аса ал велы – нявремдан элты хыя.

Холащ мув вай нёхамтал – щиящ лэпак манл.

Лэпак щирлна хыр лыпина ант лоңал.

Ям нэңху пилна ор хатлы хасам.

Ант ведам кущты вай ал сохты, ант ведам мойпар эвалт сохал ал эңхы.

Хатан лыпина хатлы амп ки ёхатл, ям ясаң холлан.

Пащар юх элты рэх ки артан энмас – тадал хасам олда питл.

Саран мир потрат

Тадаң увты савның ки холлан – ланьщ питта питл, луңан ки холлан – ертмал.

Тадал ки ищки па ланьщ сымал, луңал каврам питл.

Ланьщ кур илпина ки херыйл – хасамми йил.

Кати кор элты ки хойл – ищкатл.

Тыдащ курдал нохащ ки вантлат – ищки питл.

Вера Лонгортова лэщатсалды

Хой вутн касдыман яңхал, худ па вай ведпаслаты ях, олапсэл торам хорас эвалт сэңк такан лайл.

Ханты мир потрат

Тыдащ антапкол йирас, ватассы йил.

Тадаң тыдащ вуртыйи йис – хасамми йил.

Ар ланьщ ки питл – товына вуд йиңк олда питл.

Ланьщ вуд лапасна ки питл – медакки йил.

Ланьщ ки кур патына херыйл – хасамми йил.

Амп ланьщ лыпина ки коратлийл, ватассы йил.

Кадаң нёлал эвалт лыд сувал такан ки этл, ищкийи йил.

Лаңки сохал навийи ки йита питас, щитна тал еса олпа ёхатл, ищки олда питл.



Хор: Вера Лонгортова

Вай пелак ики

Вай пелак ики ийимел пидан удлиман. Вай пелак ики ким этас, адаҕсахат. Тьес-тохаш сусыдыйл. Щиты сусыдытал сахат, куропаткайт латамсат:

– Хапев, вах-вах-вах-вах-вах! Ханты ху пос йинтасты – муң хослув. Ханты ху вай вус йинтасты – муң хослув. Вай пелак ики, ёхи доңдан па, ийимен турал суппи эвты! Хапев, вах-вах-вах-вах-вах.

Итта куропаткайдал нох пурлапдат, па щиты щи мандат.

Вай пелак ики сусыдыйл каман. Ёхи доңал, хотал хосам. Лыл-йешал, ид кураптыйл.

Ван хуйс, хув хуйс, тоңха. Нох вердал. Ким этал. Най даңты щи питмал. Итта куропаткайдал халща удмел тахи эвалт па щи латамсат.

– Хапев, вах-вах-вах-вах-вах! Ханты ху вай вус йинтасты – муң хослув. Ханты ху пос вус йинтасты – муң хослув. Вай пелак ики, ёхи доңдан па, ийимен турал суппи эвты. Хапев, вах-вах-вах-вах-вах!

Итта куропаткайдал нох пурлапдат. Тута мандат. Вай пелак ики ёхи доңал. Хотал хосам. Лыл-йешал. Охал-сэмал монталмал, ид хуйл.

Ийимел лавидыйл:

– Наң, тоңха, нэмоса катдыты от ант тайдан? Нэмоса верты от ант тайдан? Щиты хатлатл хуйдан.

Щи, ат холс. Адаҕсахат тыйс. Итта ики па ким этал. Па ким этал, навия ювмал. Итта вой пуктал па щи латамтал.

– Хапев, вах-вах-вах-вах-вах! Вай пелак ики, ханты ху пос вус йинтасты – муң хослув. Ханты ху вай вус йинтасты – муң хослув. Ёхи доңдан па, ийимен турал суппи эвты.

Итта войдал нох пурдамдат, тута мандат.

Вай пелак ики ёхи доңал. Лыл-йешал. Хотал хосам. Охал-сэмал монталмал, па ид хуйл. Ийимел ищи ясңал:

– Наң, тоңха, нэмоса рупатаен антом? Ван хатл, хув хатл щиты хуйдан.

Хатдал ходал. Нох вердал. Па ким этал. Най па щи доңты питмал. Итта куропатка пуктал па латам.

– Хапев, вах-вах-вах-вах-вах! Ханты ху пос вус йинтасты – муң хослув, ханты ху вай вус йинтасты муң хослув. Вай пелак ики, ёхи доңдан па, ийимен турал суппи эвты.

Итта войдал нох пурдамдат, тута мандат:

– Хапев, вах-вах-вах-вах-вах!

Вай пелак ики ёхи доңал. Хотал хосам. Лэл-йешал. Па ид хуйл.

Ат ходал, тоңха. Итта ики, па адаҕсахат тыйл. Ким этал. Итта войдал па латамдат. Тьел-тохаш сусамтыдат. Ищи ясңел, ищи потрэл:

– Хапев, вах-вах-вах-вах-вах! Ханты ху вай вус йинтасты – муң хослув, ханты ху пос вус йинтасты – муң хослув. Вай пелак ики, ёхи доңдан па, ийимен тур суппи эвты. Хапев, вах-вах-вах-вах! – войдал нох пурдадат, тута мандат.

Щалта Вай пелак ики ёхи доңал. Тьел-тохаш сусыдыйл. Хотл хосам. Лыл-йешал. Ийимел ищи потрал:

– Нэмоса верты от, тоңха, ант тайдан. Ван хатл, хув хатл хуйтэн этл.

Иттам ики, кесы адэмал па ийимел турал суппи эватмалды. Щиталан, охал-сэмал монталмал па ид хуйл.

Ван хуйл, хув хуйл. Нох вердал па, хотал потам.

Ким этал па. Ким этал, най щи па доңты вутщимал. Итта вой пуктал па щи латамтал:

– Хапев, вах-вах-вах-вах-вах! Муң ханты ху вай вус йинтасты – ант хослув, муң ханты ху пос вус – йинтасты ант хослув. Матты тахи элты вот ёхатал – щиед полытдаюв. Ным вот ки йил – нохаш полытдаюв, нум вот ки йил – ныкащ полытдаюв. Халэват вот ки йил – Кев педа полытдаюв. Кев вот ки йил – халэват педа полытдаюв. Хапев, вах-вах-вах-вах-вах!

Там войдал нох пурдамдат, щиты щи мандат. Вай пелак ики щиты щи вотща хашл. Ёхи доңал, хотл потам.

Молайи щиты альщиса? Ванты, олаңна лув хоты хун вай пелакна ус, хоташ кепа?



Хор: «ЛД» архив

Антонина Васильевна Сибарева (Пальдина) шуңат.

Юхат щи лувел полащ тувам войдал. Войдал – щит нэңхет. Войт хун? Нэңхуй кут удапса суратты нэңхет. Нэңхуй атом ясаң педа худантас. Ийимел паратсалды. И удапсэл вевтами йис. И щи, вай пелакна хащас. И сукащман улты питас.

Щитна удтанна хунты, нэңхуй атом ясаң потарал ки, наң удапсэн доңты ясаңан потарал ки, нэңхуй атом ясаң ёхи ал тутлидыялн. Нэңхуй полащ щит.

Антонина Васильевна Сибарева (Пальдина) шуңат монцам монц

Аллина Тоярова нэпека ханшсалды



Хор: «ЛД» архив

СУРГУТСКИЙ
ДИАЛЕКТ

Кат имиҳэн

(Олаң шупал № 6 лунталн)

Өнтөлнө нөмөксэл: «Тәка тит мант панам памилән, кулән чэмотанэт мұват вәллам! Ма сиккәңчәк өт вәләм, сунтукәты вәләм». Панә тәка, ту пәхи қот пәлөкнө вәлтө әй сунтуклиңки ти нәркәмтәтәх. Йәмат сиккәң сорнәң сунтук. Сәраң кәмнам қәлат тувтәх. Панә ти тувтәх кәм. Кәм питмала панә нөқ ти қунтәмтәх. Ти тувтәх, ти тувтәх, ти пәрхинам мәнмал, әй тутлалнө өс вихли:

– Тәхнам әңкрәмта! Тәхнам вәләмта, мән сәккәңәт, мән витәңәт!

Лүв әңкрәмтәл. Ти мән, мән, панә ту пырәс ими қот қонәңа пә йөвәттахә йәх, панә өнтөлнө нөмөксэл: «Әнта, тәм чэмотан әнта мұвәли тайал? Тәким лахәрт». Панә лүвнә... лүвнә панә ти чэмотан йәхлитахә ти вәри, әнта мұвәлинат мұв? Мұв кочәхнат, мұвәлинат ти чэмотан – ылә тәврәм сунтук – лүвнә панә йәхлитахә ти вәри, тәман вәсәли. Панә вәрат тәрәмтәх, тәка тәхә әсәл, өнтөлнө нөмөксэл: «Тәка өс мұв аңкәнәш?» Лүвнә тәхә әсли, панә өс ти қунтәмтәх.

Ти мән, мән, пәрхинам мән. Ту ими қота йөвәт, ту иминә партмал сохит, ту сунтукәл сәраң қәлат ләпәң вәнч өвтыяа нөқ пихәттәх.



Хор: Nata Naumov / Shutterstock / Fotodom

Йәмат лахәрт, нөқ умәттәх. Панә тут пырнә йәкә ти ләң, ту пырәс имила. Йәкә ләңмала... панә лүв йәкә ләңмала ту пырәс ими қәлат чальильтәх лүват.

Үлпал әйнам атәм қәлат йәх. Нәвәм, ту ими панә нәвәм:

– Ә, – йәстәл, – Нөқсәң йәвән тәй нә! Мөққәң йәвән тәй нә! Қөв арәх, қөв моңт әнтә тувма тохи!

Өнтөлнө нөмөксэл: «Тут өлөң мұвәли кәл?» Ту вәр вәли, ту иминә тәт литәтат-уч липты, чайат-уч йәһәлты, әлтә лотат вәри. Ыл әлнтәх. Панә аләңкә йәхәм латнә нөқ ти вәрәхләх. Ту пырәс имил қунтынта килмал тохи! Па онтпәт йәмси қот пәләка қәтәлтәллал, па онтпәт пәхи қот пәләка. Панә тәка

аләңкә йәхәма өнтөлнө нөмөксэл: «Ма вәлә мәнәтә нә вәсәм!» Ту иминә литәтат-қулат липты, панә тәт тә мән. Ту ими йәстәл:

– Йә-а, ту нүн вәйәм, нүн нүннам кәтат-күрат вәйәм сунтукә, әлнта латнә тәм, қутңәна ымтә төвә.

Йә, тәт панә тә мән. Йәкәнам ти мәнәлнә туким лахәрт. Өнтөлнө нөмөксэл: «Тәм ләхпил төв сорнә вәхат тәләл. Йәкә өлөң йөвтәнтәм!»

Тит қөв мән, мұв ван мән. Панә ту қутәла тә йөвәт. Қутәла йөвәт, туким мәт, тәка. Ту әлнтәл латнә, ту сунтукәл қутңила умәттәх, вәлийа. Тәт ту вәр вәли.

Өстәмныңәламоңтмән. Әй қот пухәл қәрийат вәлләхән. Өнтөлнө

нөмөксәл: «Ма ту әй ныңәм тит тәхә лохәтләтал-пә әнтәм. Тит өлөң мұвәли вәрәл? Сәр әй ныңәм қота лохәтләләм. Мұв қоньттахә пар йәх, вәс қөты йәх?» Панә тәка әй ныңәл қотнам тә мән. Әйәл қота йәкә тә әт, өвпи ти пунчәх, тәми әй сәм пәләк Мәңк Ики қот мул йәкәнә тәт омәсл. Тәми әй ныңәл лөви кәрилал найнам лөльләт, йәңка кәритат, әй сәм пәләк мәңк ики тәт омәсл. Тәхнә нәвәм:

– Ма әйпа литә вәр-норәх пуләли өс тәт вәлтәл тохи.

Панә лүв ту қәһтәкинәхә панә өвпи тәврәмтәтәх, панә қутәлнам нүрәхтәх. Тәка өнтөлнө нөмөксәл: «Тәка вәлтә ким әнтәм. Ма мәта сөңнам мәнләм. Тәм ти Мәңк Икинә қәлнам әнтә тулөйәм». Панә тәка лүв вәрәксәх-пәнхәнтәх панә әй мәта сөңнам тә мән. Күрхәлнә ти туви. Өнтөлнө нөмөксәл: «Мәта тохинә өлөң мәта қәнтәқ қө өйәхтәләм. Қәнтәқ қө пә мұқ қәрасәп?» Әй мәта сөңнам панә ти мән. Ти мән, ти мән, әнта қөв мән, әнта мұв ван мән. Әй латнә иттәңхә йәтәхә йәх. Туким мәтмин атәмхә йәх.

Тәка әй латнә моқи олнә әвтәм аңкләта йөвәт, қәнтәқ қө әвтәм йух аңкләта йөвәт. Мәта ким мән – тәм олнә әвтәм аңкләта йөвәт. Төвә нөмөксәл: «Қот қөвән әнтәм вәлә. Лүв мәтли вәл.» А ти мән, мән, тәка сарнә әй қот тәт омәсл. Тәка нөмөксәл: «Күч мұвәли-пә вәла, йәкә ләңләм. Тәм мәтмин тә тәрәм пәтәхә йәхәм! Йәкә ләңләм, күч мұвәли вәлийат!» А панә тәка йәкә тә ләң, ту қота. Тәми пырәс ими... пырәс ими тәми әй ту онтпәтнат ләйхәл. Па онтпәт йәмси қот пәләка қәтәлтәллал, па онтпәт пәхи қот пәләка қәтәлтәллал. А лүв йәкә ләң панә төвә ымәл.

Ту иминә пәтәхат-уч вәри, пәта вәрхән. Нәвмиләл:

– Нөқсәң йәвән тәй нә! Мөққәң йәвән тәй нә! Вәлә мұвәлинә тәхә ирхә, мұвәлинә тәхә муңтө?

(Еллы па ул)

Аграфәна Сопочина
ханшсәллы

Хор: Tagwan / Shutterstock / Fotodom

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д. 1, каб. 106
+7 (34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 43 тз
Подписные индексы:
на год – ПА700, на полугодие – ПР561

№ 7 (1310)

Газета вышла в свет 14 февраля 2026г.

Подписано в печать 12 февраля 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,

в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-Ненецкий автономный округ, г. Салехард, мкр. Богдана Кнуянца, д. 1, каб. 106

Фактический адрес: 629007, Ямало-Ненецкий автономный округ, г. Салехард, ул. Чубынина, д. 39А

Генеральный

директор

АНО «Ямал-Медиа»

Зулинова

Марья Андреевна

Главный редактор

Яковлева

Аллина Кирилловна